

陶雲汀先生奏疏

奏摺卷十七目錄

撫蘇稿

安化陶

覆奏查訊京控事件摺子

總督會稿

附陳漕務情形嚴禁包漕陋規摺片

奏報日本夷人回國摺子

附奏徒陽運道另籌漕船由開出江摺片

請將淮揚成災五分以上成熟村莊一體緩徵

摺子

總督會稿

查明災區請加接濟摺子

總督會稿

驗收徒陽河工併催提重運漕船摺子

附片一

墊解幫丁節欠天津道庫剝價摺子

總督會稿

籌備災缺兵卹等米截留漕糧支放摺子

總督會稿

蘇府各營借支糧餉摺子

恭謝

御賜福字麅鹿摺子

蘇松漕糧因雨米粒未能勻綻摺子

附奏現辦漕運情形摺片

覆奏查訊京控事件摺子 總督會稿

奏爲遵

旨查訊京控事件據實覆

奏仰祈

聖鑒事接准刑部咨內閣奉

上諭御史李逢辰奏各省京控蠹吏重徵苛斂等案  
請敕下各督撫勒提嚴究一摺據稱自上年五月  
至本年四月一年之內除案情重大奏交各省審  
辦外其咨交各案內控涉吏胥舞弊侵吞科斂者  
有五十三件之多各省間有而江蘇爲尤甚往往

粘呈印串確有憑據更有如江蘇新陽縣監生朱心灼所呈帶徵印串內另有鈐戳註明糧戶倘有溢完米數許持串覓戶抵完字樣又有吳江縣武生費長春控稱上年收漕較往年加多等情現查五十三案中已據咨結者十八件內將原告坐誣書役免議及將書役一并斥革者祇有五件其餘大半以懷疑誤控事出有因吏胥亦訊無弊竇均免置議或從輕完案等語着通諭各督撫凡特交咨交案件務須一秉大公確切究辦如係刁衿惡棍藉端妄告卽從嚴究坐以懲刁誣倘所控屬實

亦當將奸胥墨吏嚴行懲治斷不可存將就完案  
之見益致無所畏忌其江蘇新陽縣監生朱心灼  
吳江縣武生費長春二案是否有朦混侵徵及額  
外加增情弊並着琦善陶澍查訊明確據實具奏  
等因欽此遵查新陽縣監生朱心灼前以總書  
吉惠嘉等侵收漕銀等詞京控經臣陶澍提省  
審係虛誣定擬咨部在案茲復准都察院以吳  
江縣武生費長春赴控縣書倪顯揆等浮勒條  
漕等情咨回審辦當提兩案人卷來蘇飭據蘇  
州府等錄供由司詳報臣陶澍隨親提研鞠會

戶銀米道光三年夏間新陽縣被水成災條漕  
奏准蠲緩凡災前預完者照例流抵四年新賦其  
蠲緩數目按年分帶頭緒繁多應隨時核算查  
照舊章改用活串恐糧戶仍照原額誤行溢完  
故於串內鈐用戳記載明許其覓戶抵補字樣  
俾衆共知以杜書吏侵朦四年分朱心灼應完  
糧銀八十八兩零於九月二十三日帶銀四十  
四兩零赴櫃交納櫃書姜定符查明朱心灼有  
三年災前預完銀十兩零除抵算外尙欠銀三

十二兩零內有溢完朱德慎等戶共銀二錢零  
因朱心灼未將印串帶驗無憑割抵言明俟全  
完時扣除又朱心灼有應完朱炳一戶漕糧每  
年本應帶徵米一升九合因彙同各戶開單抄  
數時記書俞蘭言照單口報清書姜佩蘭按冊  
查抄誤聽炳字作賓將同莊朱賓戶下帶徵米  
二斗三升八合之數抄給朱心灼卽如數完納  
并因剩有餘米自願將分限帶徵之朱易成戶  
糧全完掣串嗣姜佩蘭查出朱賓係朱敦厚的  
戶業已完過告知糧書柳應春稟縣根查覓戶

抵換詎朱心灼佯爲不知並以四年春間各紳士勸捐協濟災民朱心灼不允曾在公所被董事李平山縣書吉惠嘉等斥其爲富不仁彼時隱忍未發適因該書等悞抄朱賓米數遂以爲有隙可乘稱係朦徵並將自願全完朱易成戶糧捏作侵收預完朱德慎等戶糧銀指爲不准流抵前赴都察院具告此原訊朱心灼情節及現經究出捏控之根源也又費長春有應完費潮奎一戶條銀每忙五兩八錢零於道光五年啟徵時赴吳大觀錢店內兌換糧銀吳大觀統

算市平較庫平爲輕應補平升水加以火工每  
兩需錢一千三百四十四文費長春與之較量  
致相口角素知吳大觀係縣書倪顯揆之壘疑  
有浮多是年冬費長春完納漕米十八石一斗  
零其時試行海運慎選米色通飭各縣親自駐  
倉認真查驗費長春米雜致被風篩折耗較多  
心懷不甘遂將折數捏稱加收並因與倪顯揆  
素有訟嫌將吳大觀所算銀價合作該處行用  
之八折錢一千六百八十文指爲倪顯揆等浮  
勒具詞京控此又現訊費長春牽告之情節也

臣陶澍恐該書等實有朦混侵徵及額外加增  
情弊復向嚴究據姜定符等供稱朱心灼當四  
年分完銀時欠少三十二兩零費長春尙有應  
納三四年分條銀共八兩零至今未完正額尙  
抗何肯額外增完且朱炳係朱心灼己戶姜佩  
蘭悞將朱賓米數抄給朱心灼豈有不知遽卽  
如數完納反置朱炳本戶於不問是其意存計  
告已可概見至倪顯揆於役滿後簽充漕書至  
五年間業已退卯費長春所控侵徵條漕均係  
五年分之事並非倪顯揆經手從何浮勒等語

質之朱心灼費長春均無可置辨臣恐其稍有  
屈情復再三諭令盡言仍各俯首無詞自甘認  
罪查朱心灼等係屬監生抗銀不完已干黜革  
因與吉惠嘉等口角有嫌轉捏侵浮等情藉端  
混告實屬刁狡應行斥革照例分別治罪以儆  
抗玩所欠糧銀勒令清繳縣書姜佩蘭悞抄米  
數姜定符當時不爲劃抵銀兩吉惠嘉於退役  
後又幫辦漕務倪顯揆於役滿後復簽充漕書  
俾朱心灼等得以藉口俱屬不合應與失察之  
俞蘭言等一并革役杖責以示懲儆除分案議

擬咨部核覆外合將臣等查訊緣由恭摺覆奏再蘇屬錢漕情形疲敝目前最要者如各屬歷年積欠漕尾計二次清查案內除完仍欠銀十七萬六千兩零三次清查案內除完仍欠銀七萬七千八百兩零遵照

奏定章程勒追外自道光元二三四等年核計尾欠又有未完米一十三萬餘石經前撫臣張師誠查明存串委係實欠在民勒限追賠臣等到任後復經

奏明展限責令各州縣按年賠繳而民間完數仍

屬寥寥且施欠多係大戶現如朱心灼費長春等均施欠錢漕至二三載之久猶復藉詞京控若再紛紛效尤殊於

帑項有關臣等仰承

訓諭惟有極力整頓如遇不肖官吏侵貪肥已自當嚴叅懲辦倘係刁劣衿民藉訟抗延亦惟有按律懲治以儆刁風庶漕務稍有起色合併陳明

伏乞

皇上聖鑒謹

奏

道光六年十一月十八日具

奏十二月二十日奉到

硃批另有旨欽此又同日奉到道光六年十二月初六日內閣奉

上諭琦善等奏查訊京控事件據實覆奏一摺據稱蘇省錢漕情形疲敝各屬歷年積欠漕尾計二次清查案內尚欠銀十七萬六千兩零三次清查案內尚欠銀七萬七千八百兩零遵照奏定章程勒追外道光元二三四等年又有未完米一十三萬餘石經前任巡撫查明委係實欠在民勒限追賠

該督等復奏明展限責令各州縣按年賠繳而民  
間完數仍屬寥寥且拖欠多係大戶卽如朱心灼  
費長春等案均拖欠錢漕至二三載之久猶復藉  
詞京控等語錢漕皆維正之供各州縣如果實力  
徵收何至民欠纍纍若刁生劣監任意抗延動輒  
藉詞控告尤應隨時懲辦嗣後着該督等將該省  
錢漕極力整頓如遇不肖官吏藉口民欠侵貪肥  
已卽着嚴叅分別革職勒限監追倘係刁劣衿民  
藉訟抗延並着按律嚴行拏究懲辦毋稍寬縱以  
微才風而清漕務餘俱着照所奏辦理欽此

附陳漕務情形嚴禁包漕陋規摺片

再

臣

陶澍查江蘇漕務疲敝已久在閭閻則每

苦浮收在州縣則又患刁抗緣江蘇漕額最重

一州縣之地廣袤不及百里而漕米則有三五

萬七八萬至十餘萬不等小民終歲勤勤完漕

而外所餘無幾以故持升斗赴倉者一遇風篩

折耗已不勝其苦加以使費倍覺繁難而蠹書

漕總復多朘削近來生齒日增食用日貴尤屬

支持不易此所以完納難前而深病浮收之實

情也其在州縣則終年之用度在此通省之攤

捐在此兼有

奏明彌補舊虧酌提羨餘接運銅鉛木料船隻歲  
挑徒陽運河均須協貼歷有成案在

國家經費有常不能不藉資津貼而合算卽以萬

計其需用尤急者則旗丁津貼一項前任督撫

臣荆道乾阿林保等均經奏及復經孫玉庭成

齡陳桂生等奏定以每米一石津貼銀二三錢

多者不得過五錢然計漕多之處裝載軍船百

五六十號總須用銀三四萬至六七萬不等非

必藉以入已而抗玩者卽因此挾制以爲控端

或船已開行米尙未完謂之漕尾展轉挪墊釀成參案此又州縣用費較繁深患刁抗之實情也斯二者在顛頽之州縣未必諒百姓之苦在顛愚之百姓亦未必悉州縣之難互相訴病而皆不爲無因祇有寬一分得一分以養閭里之元氣辦一事省一事以免州縣之藉口由漸而理非可程功於旦夕也惟有一種病官病民大爲漕害革除不可不亟者則包漕橫索陋規之生監是已大約富豪之家與稍有勢力者皆爲大戶亦有本非大戶而詭寄戶下者至刁生劣

監平日健訟者則爲訟米其完納各有成規而訟米尤甚每於開徵之始兜收花戶由單以同姓爲一家集零戶爲總戶一經攬收入手或醜米摳交或掛籌短數或任意遷延挨至漕船緊迫時勾通胥吏不呈由單硬開戶名包交呼朋引類晝夜喧呶稍不遂意非逞兇閩倉卽連名捏控不休竟有田無一畝而包攬至數百石者亦有米無升合而白食漕規自數十兩至數百兩者人數最多之處生監或至三四百名漕規竟有二三萬兩實駭聽聞在州縣因漕事方亟

稍遲卽罹處分不免買靜圖安其貪狡者卽因  
此勾結紳士通同漁利其庸懦者但仗漕書爲  
之抵禦而權旣下移弊更叢出漕書或轉借刁

徒之勢以恫本官層層脅制陋規日添而費無  
所出則惟有取償於鄉曲之淳良小戶爲牽長  
補短之計以致浮者益浮苦者益苦在小民方  
痛心疾首莫悉作俑所由而不知該生監所訛  
之陋規卽鄉里窮黎之膏血也伏查嘉慶十年  
五月二十六日刑部議覆鐵保等審擬吳江縣  
勒休知縣王廷瑄挪移虧缺數至累萬皆因刁

生劣監在倉吵鬧勒索陋規所致欽奉

上諭朕聞各省劣衿以收漕一節持地方官之短長而江蘇爲尤甚各該州縣或平日與之交結遂其取求慾壑旣盈卽遇不肖官吏實有罔利營私等事亦復袒庇不言徒使鄉里小民暗遭脅削設稍不遂意則遇事輒生枝節每屆開徵時挾交醜米藉端滋事動卽以浮收漕糧列名上控其實家無擔石無非包攬交收視爲利藪此等惡習大壞名教今吳江一縣分得漕規生監已有三百餘人其餘郡縣可想而知而知朕培養士子至優且渥原望其束身自愛鍵戶讀書並

當勸化閭里愚民知所觀法方不愧四民之首乃蕩  
檢踰閑至於此極尙齷然廁身士林乎所有吳景修  
等三百十四名朕卽概加以撲責亦其自取但欲養  
其廉恥此次姑免責處予以自新之路着鐵保汪志  
伊會同莫晉督飭該教官等嚴切教導隨時管束務  
使該生監等痛除前非安分守法如遇收漕時該州  
縣果有浮收入已情事自應據實劾叅倘該生監等  
不知悛改仍蹈故轍或此外刁劣紳衿有把持漕務  
訛詐陋規等事砌詞控告審屬子虛者一經查出卽  
當奏明從嚴治罪決不寬貸等因欽此仰見

聖明洞燭無微不至凡有人心自應永遠恪遵無如刁劣之徒難期悛改溯查數年以來無歲不有告漕之案自百起至二三百起不等惟今歲漕糧改由海運提用津貼無多無可阻撓挾持是以控案較少然亦不下數十起此等積習相沿既藉控爲抗以遂其包攬之私尤仗訟分肥以長其白規之數若不將此項衿棍陋規痛行裁革糧戶大小一例兌收則辦漕之經費日絀小民之浮削日增害伊何底惟是積弊已深入繁勢衆一經整頓羣然觖望大則糾衆閹漕小則造

謠興謗而京控之案必且紛紛更多臣斷不敢  
因此稍避嫌怨而辦理不容無序現已通飭各  
州縣嚴革蠹書不許入倉如敢仍前縱恣立卽  
提省究辦因思衿棍所執爲訟柄者無非以違  
例浮收爲詞如果州縣假公濟私脥削民膏自  
飽囊橐則是天良喪盡

國法難容查明後自應欽遵前奉

諭旨該州縣果有浮收入已情事據實叅劾原係正辨  
臣職在安民心當執法嚴懲以儆貪墨倘或米  
未清完而遽行薦告則虛實未辨其告漕之人

未必非包漕之人刁風實不可長

臣

與督

臣

暨

藩臬等酌商嗣後控告漕案必須查其有無抗  
糧之戶其爲包攬何疑或有漕而米未交清亦  
當飭令完漕再予審辦其集審時或原告避匿  
或不候訊結潛逃驅控毋論審虛應辦卽所控  
不爲無因亦當治以驅越刁訟之罪如此力挽  
頽風庶衿棍無可挾持而陋規可革費用自省  
不致因大戶而浮加於小民間間稍可蘇息矣  
所有現辦漕務情形合併附陳伏乞

聖鑒謹

奏

道光六年十一月十八日具

奏十二月二十日奉到

硃批所奏甚是必應整頓之事另有旨諭欽此道光  
六年十二月十五日准

兵部火票遞到

軍機大臣字寄 江蘇巡撫陶 道光六年十

二月初六日奉

上諭陶澍奏現辦漕務情形嚴禁衿棍包漕橫索陋

規等語所奏甚是江蘇漕務疲敝已久閭閻每苦浮收而各州縣用度浩繁不能不藉資津貼抗玩者卽因此挾制以爲控端積習成風互相詬病必應力加整頓務令兩得其平旣不使不肖官吏婪索病民亦不容衿棍把持藉端訐告庶可官民相安而刁風漸息如所奏旗丁津貼一項前經奏定每米一石給銀二三錢多者不得過五錢漕督統轄旗丁自應飭屬嚴查不准絲毫多索而地方大吏深知疲丁苦累亦不得不照奏定數目令各州縣酌量編發俾漕船得以遄行此項銀兩計漕多

之處卽須用三四萬至六七萬不等各州縣稍有浮收原非必藉以入已而包漕衿棍藉此橫索陋規不可不亟行革除據奏富豪之家與稍有勢力者皆爲大戶亦有本非大戶而詭寄戶下者其刁生劣監平日健訟者則爲訟米完納各有成規而訟米尤甚稍不遂意非逞兇鬧倉卽連名捏告藉控爲抗包攬分肥人數最多之處生監或至三百名漕規竟有二三萬兩實駭聽聞各州縣費無所出自必取償於鄉曲之淳良小戶爲牽長補短之計而窮民不堪朶削樂於詭寄糧名大戶生監

等包攬愈多盤剝併吞勢所不免將至小戶之糧  
田日少辦漕之經費日絀不釀成巨案不止該撫  
旣經見及自必能早爲之計力挽頽風著卽督同  
藩司將收漕章程體察情形分別酌定毋許浮多  
並嚴禁道府需索漕規及上司同僚摺交幕友長  
隨等弊一面飭屬遵照一律兌收衿棍陋規痛行  
裁革此項積弊已久人數衆多當整頓之初怨謗  
沸騰甚或糾衆肆鬧捏詞京控固爲勢所必至該  
撫惟當不避嫌怨不稍偏徇無庸預存畏葸之見  
遇有控告漕案者卽查其有無抗欠是否糧戶如

實係生監包攬或大戶紳士恃符刁抗或有漕而  
米未交清或集審時原告藏匿或不候訊結潛逃  
葛控均卽提拏嚴審奏明分別治罪朕必從重懲  
辦並著該撫移咨學政一體查察如浙江學政朱  
士彥於貧生拖欠錢糧無論數目多寡悉行扣考  
固覺過重若拖欠較多實係有心抗糧者亦應停  
其考試俟完清後再行補考倘有仍前縱恣者該  
學政亦卽查明斥革移咨該撫審辦不得稍涉徇  
縱至各州縣被控浮收銀米總宜查明是否格外  
增多有無侵吞入己分別辦理惟在該撫一秉至

公實心整飭不徒出示曉諭仍成詰誠之虛文也  
將此諭令知之欽此遵

旨寄信前來

奏報日本夷人回國摺子

奏爲日本國夷人遭風飄入內地循案護送附搭  
回國仰祈

聖鑒事據署川沙同知顧文光稟稱准川沙營移據  
汛兵地保於十月初一日在海灘巡緝見灘外  
有小船一隻隨潮漂至雇船往救內有九人救  
護到岸似係海外夷人移解到廳雇覓通事逐  
一譯訊俱係日本國越前人船戶莊右衛門舵  
工莊平水手市平孫左右衛門勝藏長之良市  
左右衛門吉左右衛門利平等九人於本年九

月初九日在本國越前置買昆布要到大坂銷  
售原是本國沿海邊駕駛不料初十日遇風打  
開至二十八日在大洋遭風大船已碎板片全  
無昆布漂失急上腳船漂泊三日遇救到此等  
情稟報前來並據蘇州藩司賀長齡臬司覺羅  
慶善會詳稱查得嘉慶十五年日本國夷人遭  
風漂至海門廳境係護送至浙江乍浦口交辦  
銅商船附搭回國有案今該國莊右衛門等漂  
收到境自應循案辦理臣當卽飭令長洲元和  
吳縣妥爲撫卹加給冬衣旋卽派員將該夷人

等護送至浙江省城咨明浙江撫臣轉送乍浦  
地方交辦銅商船附搭回國並飭行沿途地方  
官一體照料以仰副

聖主懷柔遠人至意所有撫卹日本國夷人護送浙  
省附搭銅船歸國緣由謹會同兩江總督臣琦  
善恭摺具

奏伏乞

皇上聖鑒謹

奏

道光六年十一月十八日具

奏十二月二十日奉到  
硃批知道了欽此

附奏徒陽運道另籌漕船由閘出江摺片

再

臣

查徒陽通河水無來源歲仗挑空以引江

潮然挑空止能及於河底而江水之起落無常  
一遇西風或雨水稀少卽不免陡落或一二日  
間落至數尺雖挑空深通而亦無潮可入是以  
向來漕船經過必俟春深水發始能暢行本年  
因湖河水勢難定欽奉

諭旨明年新漕四月內掃數抵壩以便趕早渡黃是  
江浙漕船尤須節節催早與往年行走情形迥  
不相同現經臣嚴飭各工員趕緊挑切寬深毋

稍懈忽並將著名古淺之猪婆灘另行籌款雇  
夫挑深至二丈有餘淤泥軟沙爲之一磬漕船  
諒可無阻惟開行須早潮水難恃萬一淺滯不  
得不預切綢繆查明代漕船由武進縣之孟瀆  
河入江逆流而上經黃牛山圖山門過焦山以  
達瓜洲嘉靖六年始濬丹陽至京口諸處淤淺  
令運船避孟瀆風濤之險事載明代會典足徵  
往時漕船本可由江直上不專恃徒陽運河也  
第從孟瀆沿江至瓜洲計程百里而遙且孟瀆  
已淤塞刻難議復臣往來丹徒境內見有橫閘

越閘均係由運河通江之路民商船筏出入甚  
便其地在焦山南岸稍東數里較孟瀆達瓜洲  
舊路約近十之七八橫閘視越閘尤近若漕船  
從此出江用紅船引帶過焦山抵瓜洲口不過  
三十餘里半日可到詢諸土人兼查舊卷前此  
嘉慶二十四年冬間因潮小阻滯漕艘未能歸  
次曾將浙江回空船隻不入京口逕從橫閘試  
行議者紛紛以爲船逕焦山旁多礁石設有疏  
損誰執其咎遂將各船截回其時先到之船業  
已過閘駛入運河並無妨礙可見橫閘出江非

不可行實由人情之畏難而苟安也臣思江廣漕船由長江千數百里始抵瓜洲所過崖磯如焦山者甚多是江浙漕糧由閘出江亦祇須設法防護不必因此畏縮至漕米經由江河損壞之事亦所時有自應照例辦理惟事係預籌必須

奏明庶免臨事觀望所有來年漕船仍由京口運行原不必鰥鰥過計倘或潮枯淺滯臣卽當親詣江閘相機籌辦斷不敢稍涉輕疎亦不敢坐視延誤理合附片陳明伏乞

聖鑒謹

奏

道光六年十一月三十日具

奏七年正月初三日奉到

硃批另有旨欽此道光六年十二月二十三日准

兵部火票遞到

軍機大臣字寄江蘇巡撫陶道光六年十二

月十五日奉

上諭陶澍奏徒陽運河挑切寬深惟來年江浙新漕  
須趕早抵霸渡黃恐屆時潮小淺滯難行另籌由

閘出江之路等語本年徒陽運河業經該撫飭屬  
挑切寬深並將古淺之猪婆灘雇夫挑辦來年江  
浙漕船經行諒不至有阻滯茲該撫慮及彼時潮  
水尙小恐誤漕行查有橫閘越閘均可由運河通  
江而橫閘尤近若由此出江經過焦山抵瓜洲口  
僅止三十餘里半日可到係爲先事籌備之計惟  
江浙漕船經臨徒陽自應照常由正河行走最爲  
穩妥著該撫察看情形倘屆時潮水不旺實在淺  
阻難行該撫當親往江閘相機籌辦務令漕艘迅  
速暢行不可稍有延悞將此諭令知之欽此

請將淮揚成災五分以上成熟村莊一體緩徵

摺子

總督會稿

奏爲查明淮揚各屬本年被水成災五分以上成熟村莊應徵錢糧一時未能完納恭懇

聖恩照例一體緩徵以紓民力事竊照江蘇省本年被水成災及勘不成災各處先經臣等會摺

奏請

恩施分別給賑蠲緩並聲明成災田地在通境額田五分以上如須援例緩徵者查明專案詳辦已

蒙

諭旨允准當經恭錄轉行欽遵辦理茲據江寧布政使張志緒轉據淮安府屬之山陽安東揚州府屬之高郵泰州甘泉寶應等州縣先後稟詳該州縣本年夏秋陰雨連綿並值壞水下注各處田畝均被漫淹成災較廣以通境額田而計俱在五分以上所有隣近成熟村莊應徵新舊銀米麥豆難以催輸應請援例一體緩徵等情由司覆查明確詳請具

奏前來臣等伏查定例成災五分以上州縣中之成熟鄉莊應徵錢糧准其一體緩至次年秋成

後啟徵又嘉慶十九年及道光三年江蘇各屬成災五分以上之熟田應徵錢糧亦經

奏准緩徵有案今山陽安東高郵泰州甘泉寶應等六州縣被水較廣成災田地俱在通境額田五分以上其成熟村莊皆與災區毗連間有薄收僅堪稍資口食若令完納糧賦民力實形拮据相應恭懇

聖恩俯准將山陽安東高郵泰州甘泉寶應六州縣本年熟田應徵新舊銀米麥豆照例緩至來歲秋成後再行啟徵以紓民力除飭查造應緩款

冊另行咨部外謹合詞恭摺具

奏伏乞

皇上聖鑒謹

奏

道光六年十一月三十日具

奏七年正月初三日奉到

硃批另有旨欽此又同日奉到道光六年十二月十五日內閣奉

上諭琦善等奏請將各屬成災五分以上之成熟村莊一體緩徵一摺江蘇省本年被水成災州縣前

經降旨分別給賑蠲緩茲據該督等查明淮揚所屬被水較廣成災田地俱在五分以上其成熟村莊皆與災區毗連薄收僅資口食若將糧賦徵納民力未免拮据著加恩將山陽安東高郵泰州甘泉寶應六州縣本年熟田應徵新舊銀米麥豆緩至道光七年秋成後啟徵以紓民力該部知道欽此

查明災區請加接濟摺子

總督會稿

奏爲遵

旨查明江省災區來春應請酌加接濟仰祈

聖鑒事案查承准軍機大臣字寄道光六年十月初

六日奉

上諭本年江蘇高郵等州縣被水來春如有應須接濟之處查明據實覆奏等因欽此仰見

聖主軫念災黎有加無已臣等跪誦之餘莫名其妙感

當卽恭錄轉行欽遵確查去後茲據江寧布政使張志緒蘇州布政使賀長齡查明各州縣衛

情形分別詳請核

奏前來伏查江蘇省本年被水成災及歉收各屬  
經臣等先後

奏奉

恩旨分別蠲緩賑卹給予口糧凡屬災黎俱已共慶  
生全無虞失所感沐

鴻慈至優極渥茲復奉

特諭垂詢臣等細加體察除蘇藩司所屬間有雨水  
被歉情形本輕均毋庸議外至江淮等屬本年  
被水成災內句容縣六七分災極次貧民泰州

九分災極次貧民亦均可毋庸接濟其餘被災  
各州縣衛業經給予賑濟口糧但係積歉之區  
現在積水多未消涸二麥尙難播種民情困苦  
來春青黃不接之際不免拮据應須接濟又今  
冬未經請給口糧之蕭縣坊一上等二十七里  
半徐州衛屯坐蕭縣孝三等十一里沛縣干一  
等五里勘不成災乏食貧民同沐陽縣六分災  
次貧及勘不成災乏食貧民今冬尙可支持來  
春亦須接濟相應恭懇

天恩將高郵興化東臺寶應江都甘泉山陽阜寧清

河安東鹽城上元江寧江浦海州沐陽等州縣  
被災十九八七分極次貧民並六分災極貧同  
泰州十分災極次貧民及淮安大河二衛坐落  
各縣飢軍來春均予展賑一月邳州成災五分  
及勘不成災各營社宿遷縣勘不成災北一等  
三十七圖沛縣成災五分坊一等十二里乏食  
貧民

加賞一月口糧蕭縣勘不成災坊一上等二十七里  
半徐州衛屯坐蕭縣孝三等十一里沛縣干一  
等五里沐陽縣六分災次貧及勘不成災之塘

溝等保鎮乏食貧民

賞給一月口糧貧生兵屬飢軍一律照辦俾閭閻益資拯濟仰荷

皇仁實無紀極其餘勘不成災歉收各屬統俟來春察看情形如有無力佃農應須酌借籽種口糧及出易平糶之處臨時酌量查辦所有查明淮揚等屬被水災黎來春應須接濟緣由謹合詞

恭摺覆

奏伏乞

皇上聖鑒訓示謹

奏

道光六年十一月三十日具

奏七年正月初三日奉到

硃批候旨遵行欽此道光七年二月初五日准

戶部咨道光七年正月初二日內閣奉

上諭上年江蘇省高郵等州縣被水歉收業經降旨  
分別蠲緩給賑小民自可無虞失所惟念今春青  
黃不接之時民力未能饒裕除句容縣六七分災  
及泰州九分災極次貧民毋庸接濟外著加恩將  
高郵興化東臺寶應江都甘泉山陽阜寧清河安

東鹽城上元江寧江浦海州沐陽等州縣被災十九八七分極次貧民並六分災極貧同泰州十分災極次貧民及淮安大河二衛坐落各縣飢軍均予展賑一月邳州成災五分及勘不成災各營社宿遷縣勘不成災北一等三十七圖沛縣成災五分坊一等十二里乏食貧民加賞一月口糧蕭縣勘不成災坊一上等二十七里半徐州衛屯坐蕭縣孝三等十一里沛縣干一等五里沐陽縣六分災次貧及勘不成災之塘溝等保鎮乏食貧民賞給一月口糧貧生兵屬飢軍並著一律照辦用示

朕履端布惠慶洽蒸黎至意該部卽遵諭行欽此

驗收徒陽河工併催提重運漕船摺子附片一  
件  
奏爲驗收徒陽運河挑工並催提重運漕船緣由  
仰祈

聖鑒事竊照徒陽運河木年輸屆大挑工段綿長兼  
漕行緊迫更非往年挑工可比前經臣親詣確  
勘將應挑應撈工段督同道府各員逐一估計

按段安設誌椿封墩加用灰印以杜偷減弊混  
並責成該道府就近督飭各工員趕緊償挑務  
期一律深通勒限二十天一律竣事報候驗收  
兼委素能辦事之金壇縣丞周恭壽隨同梭織

查催俾資委速茲據常鎮道劉名載鎮江府知  
府竇欲峻等稟報自開工以來天氣晴和人夫  
踴躍略無阻滯惟本月初八日殊雪續紛厚及  
數寸却非雨水於挑工無損截至十三日丹徒  
境內各工已八分有餘丹陽境內亦挑有七分  
數日內即可遵限告竣預行稟候驗收等情臣

卽於十六日自蘇起程十八日抵工次逐段查  
催自丹陽縣八里橋東之青陽舖起至丹徒縣  
之江口壩止共計一百二十餘里中間挑切各  
工均與原估寬深丈尺相符間有一二段未能

迅速之處當經面飭趕挑完竣專派常鎮道驗  
收徒闢以東各工臣卽由閩西勘驗至江口俱  
屬深通比卽將封墩子壩逐一起除於十九日  
戌刻啟放江口大壩目擊江湖注入甚爲順暢  
隨卽飭提鎮江重運漕船試行出口二十一日  
風轉東南各船接續挽出楊子江對渡瓜洲其  
餘常州各幫前經臣於路過時面諭縣幫尅期  
兌開跟船渡江至蘇州松江太倉等屬漕糧向  
稱疲敝在幫丁難免需索而包漕大戶暨混食  
白規之衿棍尤屬大爲漕害彼此相持易滋延

悞現在承准軍機大臣字寄欽奉

諭旨飭禁漕弊經臣迭飭各屬極力整頓並敬謹節  
錄曉示俾資警戒刁生劣監已知斂迹其幫弁  
縱任旂丁勒索陋習前經臣

奏明嚴禁現查有擅離幫次之領運千總路廳經  
臣札飭糧道速卽撤換並咨明兼署漕督臣琦  
善一體嚴飭在案倘有借詞挑剔停兌指勒希

冀暗增幫規者定卽嚴叅重懲務俾去弊速漕  
力  
難  
不可  
滿  
謹遵四月二十日以前掃數渡黃之

諭旨毋許稍有支延以冀仰副

聖主塵念漕儲之意所有驗收運河大挑工程啟壩  
催漕各緣由謹會同兩江總督臣琦善合詞具  
奏伏乞

皇上聖鑒謹

奏

道光六年十二月二十二日具

奏七年正月十九日奉到

硃批知道了欽此

再此次挑河工長期促各州縣辦漕緊急難於分身照料經藩司賀長齡會同該道府議令各舉幹員代辦現在各委員咸知奮迅其尤爲出力者已飭司分別存記隨時獎勸惟丹陽縣主簿鈕信友因承挑吳江無錫丹陽各縣工段較多夫力難敷暫將餘土貯積岸上俟河底挑工完竣再行搬運別處係因開壩在卽權宜辦理但恐搬運時稍有未盡或致傾卸入河已飭該道府另委妥員勒限掃除務期淨盡其夫價卽於鈕信友領項內劃出倘有支延卽行叅辦此

外如吳江震澤無錫金匱武進陽湖均係漕行  
要路各有應撈應濬處所經臣札飭藩司轉飭

各該縣查照章程分別捐辦又丹徒縣境之猪

婆灘向多古淺因北岸有積淤二處莫測其底

俗名大奶小奶自明史河渠志卽言其多軟泥

有云運河鑿山而成此係過脈泉眼甚多或言

其下通江湖一經挑動沙泥愈出愈多噴塞滿

河不可收拾每年挑河時僅能刮去浮面一層

不敢深入而放水之後奶沙隨卽入河漕艘往

來及民商船隻深以爲苦臣與藩司賀長齡籌

議挑治務窮其源當委縣丞周恭壽前往逐細  
相視隨同該道府暨丹徒縣吳淡鹽大使黃冕  
等相機挑辦預將兩岸山崖展寬用木縱橫架  
擋軟泥之上以便置足一面用桶戽水集夫二  
千餘人跑牌搶挖深至二丈七八尺爛泥罄盡  
業已見底百數十年之古淺一律深通以上各  
工係在估冊之外現已另籌挑竣於運道可期  
有裨合併附片具陳伏乞

聖鑒謹

奏

道光六年十二月二十二日具

奏七年正月十九日奉到

硃批所辦好知道了欽此

墊解幫丁節欠天津道庫剝價摺子 總督會稿

奏爲江蘇省各幫丁節欠天津道庫剝價等銀請  
先動項墊解並酌議分年扣歸緣由仰祈

聖鑒事竊照江蘇省各幫漕船節年借支天津道庫  
剝價等項積欠未歸銀十一萬二千四百六十五兩零前准直隸督臣那彥成咨會奏奉

諭旨著將欠解各款銀兩迅卽派員解還直隸如此  
內尙有未經提扣之款並著由該省司道庫先行  
籌項撥解以敷支用而清懸款等因欽此並准戶  
部咨行前來臣等當卽恭錄轉行欽遵籌解去

後今據江安督糧道額謄伊蘇松督糧道湯藩  
查籌款項請先動墊起解等情會詳請

奏前來臣等伏查江蘇省各幫丁積欠天津道庫

剝價等銀十一萬二千四百六十五兩零內除

江安糧道於本年押運北上時解過銀一萬兩

又安慶後幫抵解過銀七百八十四兩零並現

在陸續扣存道庫尙未起解銀六百九十一兩零

外核計江糧道所屬各幫仍有未經扣解銀一

萬七千五百一十一兩零又蘇糧道所屬各幫

積欠銀八萬三千四百七十九兩零共銀一十

萬九百九十一兩零飭據該道等查明現無本款扣存亦無別項閑款可籌惟直省旣經奏明此項積欠攸關轉運難以遲緩自應欽遵

諭旨另籌撥解查道庫漕項正款現有存銀堪以墊用應請按數先行動支同江糧道庫已扣未解銀六百餘兩一併委員解還直省以清欠款仍於各幫照數扣還惟各幫丁本有應扣之款且上年首二進空船截留河北甫經回南辦運一切費用倍增丁力更形疲累自須寬以期限請從道光六年冬季爲始於各幫丁應領新運錢

糧內分限四年由道扣歸清楚另行報撥除餘  
令該道等委員請咨起解外所有籌款墊解並  
酌議分年扣歸緣由謹合詞恭摺具

奏伏乞

皇上聖鑒再漕運總督印務現係臣琦善代辦合併  
陳明謹

奏

道光六年十二月二十二日具

奏七年正月十九日奉到

硃批知道了戶部知道欽此

籌備災缺兵卹等米截留漕糧支放摺子總督會稿

奏爲籌備災缺兵恤等米請截留漕糧以濟支放

仰祈

聖鑒事竊查道光六年江蘇省江淮等屬被水成災及秋收歉薄業經

奏請分別蠲緩所有應放道光七年旗綠各營兵糧局恤等米均皆缺額今據江寧藩司張志緒蘇州藩司賀長齡江安糧道額謄伊蘇松糧道湯藩會詳稱道光七年分江寧司倉應需八旗綠營並恤孤各項正閏等米除將應徵熟田並

蘇安各屬編徵米石抵支外計不敷米三萬九  
千餘石又漕河等標各營不敷米一萬二千石  
共計不敷兵糧局恤等米五萬一千餘石又松  
江府屬亦有災缺兵米七千六百石皆無款可  
動查道光二三兩年災缺兵恤等米曾經截留  
漕糧濟支有案今前項不敷米石應循照成案  
辦理請將附近江寧省倉及離各標營較近之  
江寧揚州通州三府州屬應徵本年熟田起運  
漕糧內截撥米二萬七千餘石又於蘇屬之常  
州鎮江二府屬應徵本年熟田起運漕糧內截

撥米二萬二千石又截撥興化縣徵存緩漕米  
二千餘石以上共撥米五萬一千餘石爲江藩  
司屬支放兵恤等項之用除蠲缺無徵外其蠲  
剩緩徵本款米石俟按限徵收各歸本次派搭  
還款又於上海南匯青浦三縣本年熟田漕糧  
內截撥米七千六百石爲蘇藩司所轄松江府  
屬災缺兵糧之用俟各屬帶徵災緩兵糧米款  
並下年餘剩南米按限撥還搭運等情詳請具  
奏前來臣等伏查兵恤等米皆係計口授食之需  
攸關緊要現在各災屬冊籍未齊未能實見短

缺若干自不得不先就災分情形預爲約計籌備所有江藩司屬災缺道光七年兵恤等米五萬一千餘石請截撥江寧揚州通州常州鎮江本年熟田起運漕糧併興化縣徵存緩漕又蘇藩司屬災缺七年兵米七千六百石請截撥上海南匯青浦三縣本年熟田起運漕米合無仰懇

皇上天恩俯准就近分別截留以供支放統俟各屬按限帶徵撥還搭運清款除所撥各縣米數由司道核飭遵照其應減軍船由各糧道辦理外

臣等謹合詞恭摺具

奏伏乞

皇上聖鑒訓示再漕運總督印務現係

臣琦善代辦

無庸會銜合併陳明謹

奏

道光六年十二月二十二日具

奏七年正月十九日奉到

硃批另有旨欽此又同日奉到道光七年正月初七

日內閣奉

上諭琦善等奏籌備災缺兵恤等米請截留漕糧支

放一摺江蘇省上年因成災蠲緩所有應放道光  
七年旗營綠營兵糧局恤等米均皆缺額加恩著  
照所請江藩司屬災缺七年分兵恤等米准其截  
撥江寧揚州通州常州鎮江熟田起運漕糧併興  
化縣徵存緩漕共米五萬一千餘石蘇藩司屬災  
缺七年分兵米准其截撥上海南匯青浦三縣熟  
田起運漕米七千六百石就近分別截留以供支  
放統俟各屬按限帶徵撥還搭運歸款此項災缺  
兵米例應於成熟地方發價採買撥放今暫准截  
借漕糧嗣後不得援以爲例該部知道欽此

蘇省各營借支糧餉摺子

奏爲蘇省各營循例懇

恩借支糧餉銀米分季扣還歸款以恤兵艱仰祈  
聖鑒事竊照蘇省所屬營分於坐落及昆連地方偶  
遇災歉之年歷經

奏請借給銀米有案道光六年松江鎮江等屬雨  
水過多田禾木棉受傷收成歉薄業經

奏請分別緩徵茲據川沙等營先後詳報因駐劄  
歉收地方及昆連歉地米糧昂貴兵丁買食維  
艱循例請借銀米均經臣批司查議去後今據

蘇州布政使賀長齡詳稱查明駐劄歉收地方之川沙鎮江提標中左右前後城守南匯等營應請准其借給一季銀米駐劄歉地之青村營現祇請借一季餉銀亦應准其借給如續請借給糧米再行照辦其毘連歉收地方之孟河吳淞劉河金山太湖左右楊舍福山等營應請准其借給一季餉銀毋庸並借米石核計請借兵餉銀三萬九千二百七十六兩九錢兵米五千三百二石八斗照例從道光七年春季爲始在於應支糧餉內分作八季扣還歸款餉銀在於

司庫地丁正項銀內動給兵糧米石於各屬南  
米並現在災缺請截熟田漕糧項下撥給詳請  
具

奏前來臣查松江鎮江等屬本係連年積歉之區  
茲因雨水稍多收成歉薄據各該營詳稱米糧  
較昂兵力拮据所有駐劄歉收地方各營兵丁  
仰懇

聖恩准其借給一季銀米其毘連歉地各營亦請酌  
借一季餉銀統於道光七年春季起在於月餉  
內分作八季縮扣還款以資接濟除飭司撥放

具款冊詳咨外

臣

謹會同兩江總督

臣琦善

恭摺具

奏伏乞

皇上聖鑒再此外各營如有續行請借查明是否坐落歉收地方照此分別辦理合並陳明謹

奏

道光六年十二月二十二日具

奏七年正月十九日奉到

硃批另有旨欽此又同日奉到道光七年正月初七

日內閣奉

上諭陶澍奏蘇省各營循例請借糧餉銀米一摺江  
蘇松江鎮江等屬上年雨水過多收成歉薄米價  
昂貴兵丁買食維艱著照所請將駐劄歉收地方  
之川沙鎮江提標中左右前後城守南匯等營准  
借給一季銀米駐劄歉地之青村營及毘連歉地  
之孟河吳淞劉河金山太湖左右楊舍福山等營  
准借給一季餉銀統計借給兵餉銀三萬九千二  
百七十六兩零卽在司庫地丁正項銀兩動給兵  
米五千三百二石零在各屬南米並現在災缺請  
截熟田漕糧項下撥給照例於道光七年春季起

在該兵丁等應領月餉內分作八季扣還歸款該  
部知道欽此

恭謝

御賜福字麅鹿摺子

奏爲恭謝

天恩事道光六年十二月二十日摺弁回蘇齋奉

御書福字及麅鹿等肉

頒賞到臣謹卽恭設香案望

闕叩頭祇領

奎光煥耀雲螭昭捧

日之心香氣綑天靈表迎年之

瑞欽惟

皇上乘乾布凱

調泰延洪上康樂安平爲一書綿區戴  
福合麟鳳龜龍爲四畜匝宇遊

仁俾以昌俾以熾燕喜則

嘏原

申錫維其旨維其時魚麗則

道協庚由序應始和時逢肇紀

麻凝戢穀增如山如阜以

均禔

澤洽誠和廣宜民宜人而受祿

微臣職司播

德臺共登春瞻普汜於

福林星輝

寶墨驗蕃滋於

祿囿露湛

瓊厨際茲

念切宣防

嚮範而鴻流克奠定卜

勲宣撻伐食肉而狡窟全除

吉迪

祥來願效魚藻賡歌之意民熙物阜載頌鶯鶯福祿

之章所有微臣感激忻幸下忱謹繕摺恭謝  
天恩伏乞

皇上聖鑒謹

奏

道光六年十二月二十八日具

奏七年正月二十九日奉到

硃批知道了欽此

蘇松漕糧因雨米粒未能勻綻摺子

奏爲蘇松等屬漕糧因稻禾結實時雨水過多米粒未能一律勻綻循例奏

聞仰祈

聖鑒事竊照漕糧爲

天庾正供首重米色所有蘇松各屬應行起運道光六年分漕米臣於未經開倉之先嚴飭各屬如意揀選徵收交兌不許稍有潮雜茲據蘇州布政使賀長齡蘇松督糧道湯藩詳稱蘇松等屬徵收漕糧米色均屬乾潔惟因秋間大雨連綿

低窪之區致被淹浸熟田亦因稻禾結實時雨水過多米粒間有青腰白臍未能一律勻綻該道親詣各倉逐加查驗並飭各屬倍加挑選趕收兌開以期迅速等情會詳請

奏前來臣查漕運全書內載有漕省分如有米色不齊令於漕糧未運之先預行題明等語今本年起運漕糧因秋間結穗時爲雨水所侵以致米粒未能一律勻綻委係實在情形除飭各屬卽選乾潔好米交幫領兌並令糧道運員督率弁丁作速開行毋許藉詞支延外謹循例會同

兩江總督兼署總漕臣琦善恭摺具

奏伏乞

皇上聖鑒謹

奏

道光六年十二月二十八日具

奏七年正月二十九日奉到

硃批戶部知道欽此

附奏現辦漕運情形摺片

再

臣

前奏徒陽運河估挑寬深惟新漕開行須早誠恐屆時潮小難行查有丹徒縣之橫閘可以另籌出江承准軍機大臣字寄道光六年十

二月十五日奉

上諭往陽運河業經該撫飭屬挑切寬深並將古淺之沿婆灘雇夫挑辦來年漕船經行諒不至有阻滯茲該撫慮及彼時潮水尙小恐悞漕行爲先事籌備之計惟江浙漕船經臨徒陽由正河行走最爲穩妥倘屆時潮水不旺實在淺阻難行該撫當

親往江關相機籌辦務令漕艘迅速暢行不可稍有延誤等因欽此除恭錄轉行欽遵外伏查徒陽運河原係鑿山而成兩岸陡立崖土易傾兼之潮汐挾沙而行水去沙停動形淤塞定例每年小挑一次六年大挑一次而挑濬時又必俟江浙回空過竣之後夫役人等每因天寒期促挑出之土此等積糞取為河惡夫役人等無足深怪大小官吏未能遠送別處多有墊崖貼腮之弊一遇雨雪仍行坍卸入河以致河身淤淺船行阻滯此次輪屆大挑工段綿長經臣嚴除積弊疊飭道府督率工員認真挑空現已如式報竣長

硃批

硃批

河一律深通連日雪雨應期運河有水此後江潮旺盛自應照常由正河行走以臻穩妥倘或屆時潮水微弱淺滯難行臣卽當親詣江閘相機籌辦務俾漕船穩速趕赴禦壩趁早渡河免致盛漲經臨又有借黃剗灌之虞以全大局臣延好現在鎮江常州各船業已兌開次第渡江駛入瓜口蘇州首幫亦已就道計各屬漕船早開且多爲向所未有察看水勢亦足資浮送各船跟接前行足慰

宸厰理合將奉到

諭旨暨現辦漕運情形附片覆陳伏乞  
聖鑒謹

奏

道光六年十二月二十八日具

奏七年正月二十九日奉到

硃批辦理甚好欽此